

邃

懷

堂

全

集

邃懷堂詩集前編卷五

揚州 辛卯至甲午九月

寶山 袁翼 穀廉

來往邢溝路年荒事漸非計然牟利倦卜式奏功微
塔影隨船走鐘聲隔樹飛可憐二分月兒女照依依

題胡鑑淵同年西溪草堂圖

竹瓦松棚罨畫邊金鶯山翠撲吟牋人間清福無過
此廿畝新添種秫田

漁弟樵兄共結鄰藕花香裏一荷巾輸他年少緋衣

輩日逐安仁拜路塵

著書數尺等身量老輩飛騰翰墨場今日蘆溝橋上
月照君兩鬢已如霜

孝侯臺畔樹森森約我他年買棹尋一卷新詩千甕
酒草堂來伴老雲林

送周小農同年之官閩中

吾聞七閩地宋時理學藪漳浦導淵源繼者榕榔叟
其風雖刁悍其氣自深厚巖沙礦石中光彩隱瓊玖
瓦瓦械樸材可以作薪槱智不在刀筆威不在械杻

勸士聚膠庠課農力菑畝愛鳥勿畜鶴植苗先薅莠
使君如父母循循而善誘一編活人書出入繫諸肘
君以繡虎才文壇早凌蹊四十成進士春雷佐雄吼
未登承明廬出佩郎官綬捧檄至三山手版學趨走
毋謂風塵俗仙吏古來有毋謂州縣微異日印如斗
宜僚纍丸時纍一不難九與可畫竹時成竹不在手
孰是蝗避境孰是雉初穀西京循吏傳羅列待君取
況君年富強堂上正耆耆南歸卽迎養並侍有嘉偶
花前扶板輿燈下侑春酒而我客京華椿庭缺甘滫

反嫌髀肉生漸憎鬢絲醜選人多於鯽我更居鯽後
撐睫盼得官幾時夢腐朽君渡桑乾河我折燕臺柳
平生車笠交屈指復誰某相隔六千里烏輪轉卯酉
守子不貪寶享我敝餘帛努力崇明德五字贈良友

題小農春明送別圖

翦燭連牀共夕晨袁絲兄事獨相親書生本色能諧
俗才子爲官不厭貧萊綵堂前重九酒墨花榜上第
三人炎陬文獻今誰繼難步興安夾漈塵

潑盡瑣瑣墨一甌帝城風景卷中收青雲得路君

搏翮白髮依人我贊疣山色蒼涼連柘寺河聲澎湃
入蘆溝郎官星照南臺遠手疊詩牋訪隱侯

沈夢塘先生久

中客闌

破甑

本來瓦礫是庸資黃土搏成亦可嗤巧婦難炊無米
日英雄猶有失聲時神倦未必留殘藥身世真教比
漏卮料得萊蕪塵一寸缺薪並不爨扊扅

敝屣

頻年足繭走長途擾擾浮生幾兩需待詔未聞求故

屢依人何苦繫明珠西華羣從當風立東郭先生冒
雪趨莫向泥沙便拋棄雲程祝汝化飛鳧

斷劍

歎息千金一擲輕蒼茫紫氣失豐城牀頭憶汝聲如
吼世上由他事不平熱血繡成瘢幾點雄心灰盡夜
三更此時倘共鉛刀試定笑干將浪得名

昏鏡

壽陽宮裏記前身鵲紐鸞盤辨漢秦笑我妍媸何用
認照人肝膽本非眞模糊新月三分影滓穢靈臺一

點塵落盡芙蓉紅粉老蛾眉不掃遠山春

龍興寺瞻銅像大菩薩

寺在正定府城中東門銅像釋迦佛爲元魏
皇興元年所鑄高四十二尺用銅十六萬斤
黃金一千斤覆以重樓而空其中以居之登
第三層始得平瞻寶相雕鏤精緻殆非人工
慧眼遐觀幾及千里

列聖巡幸五臺 駐蹕祇禮焉

牛馬興謠讖江山苦戰攻真人起沙漠自北控西東

歷數歐基遠車書毳域通業傳崔浩偉治仰孝文隆
聽政勞神母繙經禮大雄乾羅龍藏秘震旦象王同
寺啟迦陀古城開舍衛崇飛梁雕白玉法像範青銅
瓔珞花鬢翠琉璃寶炬紅八千獅座月十萬鵠鈴風
葱嶺慈雲護芝龕聖水供丘胸羅四諦綿臂振羣蒙
氣尙騰金虎跃眞躡彩虹蟠靈河朔野角勢灑南宮
興毀天難問荒淫佛亦恫僧祇功德在拓跋霸圖空
警蹕來巡鎬懷柔效祝嵩琳瑯輝鳳敕丹艤集鳩
工恒獄排霞嶂滹沱走石谼轉輪身不壞屹立太虛

中

過正定

風雪過恒州滹沱涸不流地分唐節鎮山鎖趙咽喉
抱犢嘗成未聞雞客舞不武靈開霸業遺恨滿沙邱
井陘道中

獵獵旌旗背水初乾坤虎戰與鯨咷衝牙地險爭燕
趙刎頸交寒笑耳餘百級雲梯盤石磴一灣綿蔓抱
邨墟誰知國士淮陰外尙有無雙李左車

四天門

九曲羊腸萬仞懸桐輪摧折馬蹄穿中原路入天門
陡太古人棲土穴圓磽底聞聲開石炭樹梢捲影出
窯煙英雄設險真如夢一局殘棋事可憐

謁狄公祠

陰森古木亂啼鴉丞相祠堂暫駐車一代公門高北
斗七年朝局挽南衙夢中天意回鷓鴣海內人心望
李花故里今來拜遺像白雲親舍感無涯

登小五臺

文殊院傍白雲開分得清涼小五臺人影半空同塔

立山光四面跨城來吹簫汾水中流曲躍馬沙陀幾輩才金粟名園誰記得斷碑無字臥蒼苔

遊崇善寺

梵王宮殿晝冥冥風過惟聞語塔鈴香積廚荒僧賣樹法華輪轉鳥聽經茶烹小院山泉綠燈照前朝佛火青留得王孫殘帖在寶賢何處訪遺局

傅青主先生故居

一代南邨節千秋汐社書遺黎多感慨聖世宥迂疎遠道昇牀日殘生絕粒初太原周黨傳披讀爲歎

獻

欲購雙龕集難招土穴魂文嗤歐永叔字薄趙王孫
廿載黃冠意中原碧血痕夜臺應默笑今傍晦翁門

小五臺有朱子

祠以徵君配

西園偶成呈徐詠之方伯

山深春信到遲遲四月桃花初放枝無事可邀犀首
飲有情且作虎頭癡粉廊趁月評殘帖石井分泉灌
小池一棲園蔬新荷鋪知公菜色念民饑

恬養知齋夜坐戲作雜詩二首示毘陵張定甫

斗室團團聚他鄉卽一家。糊雲母紙砌種石男花
官事分雙燭私錢買片茶。炎熇天氣少衣不著單紗。
汾酒佳難得并刀利怕持濫吹圖一飽治病混三醫。
纏布裁猗氏香杭甞晉祠睡中煤氣臭坑寢正溫時。

晉中詠古

綿上田

家家寒食禁厨煙暮雨梨花一片田母妹荒山裡骨
處英雄末路負心年蛇潛尙有懸書客戶解曾逢賣
扇仙神仙傳戰國時人逢之推賣扇於海上載得西施身便隱千秋祇

羨五湖船

長平阤

四十萬人同日死至今鬼哭尚啾啾空倉蔓草連京

觀古鏹生花滿髑髏定有輪迴昭果報可無廟食祀

春秋千金反閒廉頗去罪首爰書是應侯

白起在地獄荷鐵校

見輟耕錄唐元宗命有司立廟於長平春秋祀之

石勒城

白氣垂天鼓角鳴山頭草木盡成兵鳥從絕壑窺疑
塚人向東門識嘯聲世亂流離傭保日酒酣慷慨故

交情中原倘有劉文叔欲上雲臺未許卿

玉壁

敕勒歌殘老淚傾當年神武此南征峰連玉壘三櫓
寨天壓穹廬百里營市夕竟能移水去排空猶夢踏
星行爾朱爲汝穿牛鼻莫把郎公一例輕

汾亭

馬谷牛溪路曲紓東征歌罷講堂蕪凌煙將相皆高
弟亂世山川出大儒梓里原同卜子夏薪傳直接董
江都演元中說重離校地下劉蕡齒冷無

娘子關

一代紅粧戰將才紫荆山下義旗來
描蛾欲配凌煙像跨鳳初登弄玉臺
侍女戎裝臨水照金身佛寺傍雲開
瑤池奈促星娥駕東望平陽鼓吹哀

媚山

天冊金輪武媚娘前生李密欲亡唐雄才豈但踰新
莽國老終能用狄梁摘盡臺瓜稀種子讀完檄草歎
文章我來艷水湖邊過開出蓮花似六郎

陰地關代宗冊僕固懷恩女爲崇徽公主嫁回紇

臘脂一隊跨龍媒重見明妃北地來手迹拂雲貞女
石夢魂立月望鄉臺和戎社稷頻貽恥出塞琶琵總
帶哀寄語左賢李都尉蛾眉他日尙生回

三垂岡

李晉王置酒處

獨眼飛龍起朔方鶻兒鐵騎掃朱梁三垂置酒英雄
淚五夜祈天聖主香白髮監軍空守庫綠衣天子竟
登場沙陀九姓遺民在法鼓聲中拜影堂

王官谷

不信朱三作天子時開故篋看朝衣臺空夜駐仙人

鶴谷暖春生義士
薇此膝豈因公等屈壯心可惜暮年違
中條山色青如舊手種蒼松十二圍

獨樂園

文孫聖母共垂裳一老安能臥洛陽諸葛以還真宰相
史遷而後大文章黨碑不忍鐫名姓畫像爭懸祝
瓣香新法紛紛談紹述杜鵑曉倦汴京亡

野史亭

又見銅仙泣汴河亭中野史費搜羅拾遺供奉詩源
正大定明昌國事多披髮騎鯨人已去招魂獲鹿恨

如何金家文獻中州集一代英靈氣不磨

落鴈池

元勑文忠公故第

白頭歸國髮斑斑忠孝文章兩不慚瓶乳真同羈塞
北鴈書忽已墮河南牆垣荆棘黏詩句天海風濤佐
笑談地下若逢賈秋壑問卿怎到木棉庵

正學祠

祀薛文清公

空明晶腹不沾塵纔聽啼聲識異人同里貂璫無謁
刺諸生鹿洞得傳薪奪門獄起藏弓日絕筆詩成易
簣身論定蓋棺千載後天台正學在河津

甯武關

青犧黃巾萬弩營
將軍隻手力難擰
全家忠孝同樵骨
一代存亡繫此城
舅氏斷頭空作賊
書生叩馬亦知兵
邊關故老皆無在
青史何人爲辨明

晉藩舊邸

帝子何曾跨鶴逃
玉妃淚灑赭羅袍
粧臺月冷飛鸞瓦
石帖苔封砌馬槽
賊闖踞晉府以寶賢堂帖石刻砌槽喂馬
刦換紅羊魂不返
寺遊烏鵲首重搔
桐圭河帶前朝夢
點點幽燐出野蒿

署亭看芍藥和徐六驥先生韻兼呈詠之方伯

襟前攜得皖雲來桑落今宵共潑醅座滿月華添笑

語時四月十五夜春留花相起樓臺紅帆照鑾雙枝憐綠蔭

圍香一徑槐佳話定傳金帶瑞詩成鐫上古彝罍

秋夜不寐

微疴終夜不安牀憶弟思親結寸腸燈影似隨人共
醒蟲聲偏與漏俱長半年客鬢都成雪七月邊城已有霜
啓戶獨行空院裏井星閃閃繞河潢

紙窗次韻

溪頭茅屋水淙淙側理糊成白玉窗繡鳳莫教針刺
破癡蠅來作鼓聲撞雨揮竹葉痕三兩月送花枝影
一雙料得敲詩人未睡清輝不隔小銀缸

山行

滿地冰花秋草枯夕陽西墜黑模糊雕弓玉貌誰家
子禿髮城南夜射狐

義井早發

趁墟擾擾市無塵回首汾西指一鞭屋背青山開土
穴樹頭黃犢上梯田灘聲分瀉前邨雨城影高迷古

壘烟車似鷄栖馬如狗半年來往意悽然

過韓詩亭感文公事書店壁上

車行無坦途云是太行腳齒齒露木杪萬山抱一郭
驃饑力已疲望店忽騰躍征夫得小憩如彼脫羈絡
白酒與牛脯亦足恣吞嚼臭蟲大如螭眠肩復緣
爇炬起危坐中腸火焦灼耳竅息衆籟時響駱駝鐸
當年鎮州亂文公使節握宰相李逢吉假手濟兇惡
八公來舍此驛題詩意磊落死生置度外憂患不能著
談笑諭庭湊視如潮州鰐宵小計安用君子名益爍

遂令此郵亭亘古永丹堊常山衝要地土門實鎖鑰
冠蓋日往來姓名付渺漠慨然念微軀途窮勿哀愕

出故關

東望井陘道亂石如奔湍一關蔽全趙四面圍層巒
車錯不能過可以封泥丸堞樓架睥睨烽堠蹲巒崿
障天鳥道絕伏地羊腸盤蹄鐵迸火星當知筋力酸
孤軍若深入醯雞甕中看萬弩自空發齧粉連尻醴
庸夫失地險退無寸步完古今盡如此豈獨悲成安
行抵正定滹沱河暴漲田廬漂沒車馬斷絕退

至十里外僦居野店復大雨三日示同行者
東行六日已離晉石道摧輪銳於刃蒼山中斷長河
橫嶠岸濤飛萬雷震居民避災盡奔竄水面高檻略
堪認踉蹌回馬投荒村有路可通急相趁泥牀楷壁
僅容膝感謝主人意非客手搏乾糒未敢飽深恐絕
糧作枯殫一更大雨如翻盆屋破淋漓燈忽燼呼僮
取火起敲石數客披衣各驚訝雨師三日不放晴遠
聽河流響彌振夢寐錯疑久還里蹤跡誰知尙畱輒
年來險阻備嘗遍今月黃楊又逢閏有客勸我且舉

卷之三
三
杯丈夫意氣拔千仞不見崎嶇劉文叔麥飯此閒亦
強進吾儕貧賤豈天厄世事偶然雪中印夕陽一鱗
逗虹腳遙指恒山掃雲陣縱橫轍亂避窪淖高下禾
眠恣蹂躪前途行旅共歡笑回首蒼茫獨搔鬢

過東方曼倩故里

小兒騎虎虎被籠虎嚙兒足母嗟悲朝遊崑崙暮滄
海三見蟠桃花落時先生滑稽是端士先生肥遁是
孝子仙才瞬睨王方平高文突過馬長卿平原厭次
先生里蔓草青青亂煙起窗中阿母不能窺天上歲

星猶可指

過倉頡陵

蒼帝至獲麟二十七萬年豈有不朽冢留此空山巔
想其制文字結繩易書契鑿開混沌天雕出是非世
何如泯知識悶悶而滔滔自從盤古始直到刲火焚
日月疾雙轂書多未暇讀君聽北邙山夜深鬼猶哭

宿馬蘭屯

齊東祭酒逃讒日可惜平原未識君猶有遺民懷舊
令一鉏黃土護孤墳

道光甲午九月十八日宿東灘店見店壁上有
小紅女史絕句字迹頗秀殆女子有才色而
淪落風塵者後有山陰二泉女史隨宦出都
宿此和韻譏其詩意不莊自憐而實自炫惋
惜良深余亦爲之慚然是夕風雨交作輾轉
不寐因次其韻書三絕于壁

厯遍山陬又天涯漂零紅粉已無家江東昭諫重來
此一慟人間薄命花

黃金欲贖意無涯柳絮清才屬謝家安得秋娘爲侍

女夫人門下學簪花

蛾眉若箇訪天涯抱病南歸可到家恐是吳郎題驛
壁倩娘兩字鏡中花

到家

昔夏河東去今秋趙北歸凋殘驚梓里涕淚灑麻衣
土少顏烏負庭無庚鶴飛終天百年恨何以答春暉
愛自同牛舐羣還失鴈行人天兩泡影骨肉小滄桑
灼艾難分痛搘蘭又早殤夜臺依父祖應有讀書堂

袁江別何亦民同年

春明別後久無書舊雨重逢兩載餘我愧范雲交水
部君從王景誌河渠一樽竹葉離人酒三月桃花上
汎魚傀儡暗中牽未了來朝破帽又騎驢

次贊皇縣弔李衛公

何處平泉宰相莊更無片石臥斜陽憐才易灑孤寒
涕好色難求不死方太弟六年感知遇會昌一品序
文章崖州詩識原前定辛苦中書食萬羊

抵槐樹鋪聞趙城匪徒滋事

小醜偶蠢動倉皇吏捉車白蓮遺逆種碧血殉全家

地控三山險謀生五斗邪腰間雄劍嘯自起剔燈花
汝曹自作孽不願戴頭顱治世兵原怯么麼賊易
屠噀沙同伏蠍篝火學鳴狐莫更馳輪進征人盡戒
途

遊崛嶧寺

崛嶧有下院距山四十里山色蒼然來灑落襟袖裏
信步叩雲扃一徑阻荆杞廬荒木佛燒砌裂石龜語
野花不知名開出破窑紫寺中賣藥僧日午踏城市
惟聞狺狺犬吠人隔幽渚

初夏雜感柬左夔南先生兼呈徐詠之方伯

轆轤勞生薄笨車燕奴歸去又來初河東人物思君
實左掾才名敵子虛破悶頻澆官甕酒縛愁且讀梵
王書西郊丙舍荒田在誓墓他年學荷鉏

小園草木盡抽芽四月韶光滿眼嘉蝶翅趁風捎柳
絮鵲心託月訴梨花開方偶配君臣藥報德深慙子
母瓜行省森嚴陪戟座談經初放晚晴衙

羞將新樣畫蛾眉四十年華兩鬢知書借暫觀強趙

璧亭屢向查謁
借書

花開無力晚唐詩

署中芍藥
而瘦

故人白袷

彈棋夜公子烏衣問字時未了向平婚嫁累駑駘仍
望太行馳

獨上層樓眺碧穹蒼茫山色有無中雲低聖母藏經
閣草沒高歡避暑宮筋力已非前度健生涯直以浪
遊窮臘脂坡接芙蓉峽取次探奇莫放空

遊晉祠雜詠

畫出江南景漁莊繞水田青山雙屐雨緣野一犁烟
蟋蟀風猶古嘉禾頌未傳此鄉真樂土惜少結廬錢
周遭環雉堞蔚蔚轉長林避暑遺宮沒尋仙古洞陰

花無嫌客意雲有入山心片晌苔階坐蒼痕滿短襟
弱弟靈祠啓層巒巒嶂間參旗唐分野桐瑞晉河山
繪壁龍蛇動棲梁鶴鵠閒橋邊颺笠影知是老僧還
百級霞梯挂塞衣上碧空漱瑤泉瀉月懸甕谷藏風
聖母香龕邃汾神寶殿雄村民來報賽還與昔時同
絕頂朝陽洞徵君讀易臺微君謂傅青主誰知二百載有約
兩人來同遊者左夔南嶽色黏詩卷河聲入酒杯夜深方翦
燭孤鶴自西回

雙柏交撐抱千年易歲時闊殘唐宋刦蟠到了子孫枝

風定籟微奏泉通根暗滋菩提不朽應仗佛慈悲
層層探勝地漸陟最高峰王子簫聲遠真人劍氣封
松涼消暑影草蘿認樵蹤邱壑期知己山靈一笑逢
小蘭亭跨水地勝會稽山觴詠懷人後烟波落照間
霸圖空五代旅夢遶三關欲問蓮師法天龍不可攀
欲遊天龍山不果○懸甕谷藏風句下
遺小註懸甕之山晉水出焉八字補此

過楊忠愍公墓

東市朝衫血滿襟墓門虹氣鬱森森故人空贈珊瑚
膽國士終存獬鷹心千古膺滂同列傳九原曾夏託

知音祝公生日年年酒香火松筠直至今

題徐穀翁出關圖

謫居絕域感離羣康伯當年侍仲文收入錦囊無別物秦時明月漢時雲

蕭后園中春寂寂李陵臺下路漫漫塞花猶作臘脂色留待詩人立馬看

一角孤城萬仞山琵琶聲裏唱刀環披圖觸我前年事風雪騎驢出故關

兩度金臺見徐穀樽前相對話龍沙夜深車讀秋笳

集筆灑寒霜劍吐花

題金履白先生拙存居稿

乍識平原史知爲陸遜孫遺編出耆舊剪燭讀都門

月口清光吐琴心古調存貴園修禊事展卷與重論

三昧唐衣鉢梅花得句初揚鑣沈光祿敬亭接席畢

尙書秋帆先生後輩今誰繼高風此不如武陵橋畔路博

士朗明居令嗣蘚

學博

賤子青鬚日蘇翁白髮秋

蘇翁指齋
霞先生

琴樽一夕話風

月百年樓傳待襄陽續名同甫里畱浣薇頻雒誦肺

臘滌冰甌

梁家園是蕭太后城遺址

不見龍城控鶴洲
鴛鴦殘碟出宮甌
戎粧射柳顏如玉
國事垂簾鬢欲秋
洞酒三行吹簫篥
珊瑚軍十部擁貔貅
蕭家別有傷心后
碧血魂歸斷腕樓

選仙

茅盈許掾盡驂鸞
方朔偷桃未飽餐
十萬注名香案吏
成仙容易選仙難

偶成

庭草無人綠上除落花中酒掩關初年華老大雄心
減燈下猶鈔越絕書

又見

又見槐花滿樹黃冰鮆雪筍憶家鄉年來莖豆時時
飽只少黥徒夾兩行

岣嶁碑歌

附序

禹碑在岣嶁千仞絕頂世無從見宋嘉定初
何子一遇樵者引至碑前始摹本刻於嶽麓
隱祕至明嘉靖初太守潘疊峯剔蘚搨傳於

是湛甘泉顧東橋林巽峯季彭山皆有跋楊升庵沈靖陽楊時喬皆有譯義雖其說異同要爲唐虞三代之書無疑也具詳嶽麓志及丹鉛錄余按湯陰縣志嘉靖癸巳縣令張尹吉得宋搨于星厓席公因模本勒石以廣其傳則今金石家所裝潢者皆張本卽何本且不易得況南嶽真蹟乎此碑不知何年置諸城北七里文王廟中縣令葉端齋同年寄余一通并索長歌因略志顚末於左

庚辰三月庚子日岣嶁山前王駐蹕手抉雲漢揮穹
碑蝌蚪書傳七十七披牒白馬告蒼昊呵叱黃龍護
綸墨侍臣肅觀共咨嘆伯翳扶登與童律若封莓掩
三千年寶光如虹上燭天退之夢得未曾見巖阿遐
想畱詩篇何君好古獨搜隱露壇指引逢樵仙急摹
真本付鬼斧鑿開山骨鐫雲烟優曇一現剎那影神
物詎肯遺人間扶桑帝敕六丁使金鑰夜鎖芙蓉巔
美哉禹功億萬世字形皆作迴波勢齋戒虔受山神
書點畫親窺倉頡意腕底經營造化心筆端呼吸鴻

濛氣周京籍史秦李斯猜度猶難逞私智卽今面目
嘲虎責疑有精靈禦魑魅欲讀口角如銜箝一沈兩
楊空譯義禹碑非誤釋文誤斯語清河真解事漳河
東繞羑里臺文王祠宇蟠松槐屹然文命紀功刻何
年嶽麓碑飛來舊聞張令得宋搨鈎攝魂魄重胚胎
歲次甲辰溯嘉靖龍劫已歷桑田灰鳴琴仙吏水心
齋郵筒遠贈雙玫瑰索我長歌意珍重韓潮蘇海慙
非才我昔會稽訪禹穴山花紅似防風血想見圖成
王會時百靈行在迎鑾謁朝陽洞窅泉潺湲穿石亭

荒隸殘缺中天鳥跡茲摩抄不數東都十枚碣虛堂
雷電陰森森南岳夫人恐來掣

友桐館聽琴

瀟湘千里月照此三尺琴美人一再彈遲暮發哀吟

曲罷抱琴坐涼風吹短襟微波欲通語已隔白雲深

題呂蘭坡揚帆聽琴圖

蒼茫各抱百年心不解彈琴解聽琴船近蓬萊風引
去神仙未必盡知音

爨桐聲價待中郎入耳仙音定不忘碧海朱崖身記

到回頭已易七星霜

邃懷堂詩集前編卷六

寶山 袁翼 穀廉

早行

計日歸心急連宵倍道行路歧尋馬跡村遠失雞聲
寒露一襟浣殘星數點橫江皋人喚渡吳語聽分明

貧女吟

誰言妾命薄如紗不教白璧留微瑕誰言妾身輕
葉縱有黃金買不得朝摘園中蔬青青美可食暮
機上絲皎皎已成匹莫道相逢未嫁時鷄鳴犬吠兒

嫂知

玉虛道院觀壁上張孟叟畫松

蓬萊雖近不可遊入門下馬風颺颺道人指我觀壁
畫黑雲噓翕蟠長蚪世人種松不愛松神物乃與榛
樗儻深山大澤早彫喪銅柯鍊榦供薪槱世人畫松
不畫骨鱗頽甲鏽成蟻岫畢宏韋偃死千載妙蹟無
復塵寰留吳淞張孟叟豪氣橫九州少年從事東諸
侯暮年笑傲凌滄洲自言畫松識松性能於象外窮
雕鏤丹青驅遣鳳鸞嘯風雨攬擎神鬼愁豪門金帛

購難得荒刹揮毫無待求孟叟已蟬蛻零落歸山邱
墨花噴射堊泥裂耳邊彷彿龍吟秋濤奔峽束夜倒
流虛堂五月將披裘我今巡檐三嘆息黛色隱隱掠
雙眸年來石礎長苔蘚護持欲與籠紗幙不見瓦官
寺中壁至今人說張僧繇

過田家卽事

江湖厭塵事親戚樂情話何不早力耕俯仰惜時邁
昨日上塚歸偶一訪宗派鶴黍相招邀羅列及慈雍
兒童亦韶秀呼來使肅拜宛然太古風物我忘機械

久雨喜新晴綠蓑樹頭曬

門前春漲生汨汨來谿谷礎礎補殘縫桔槔整新軸
秧針已出水分蒔綠盈掬微風度阡陌雨意尙含蓄
所幸屢豐稔官糧未剜肉勸我酌春酒還復坐茅屋
清陰滿戶牖左右茂修竹笑指桑樹根老翁昨生犢

蝸廬示內子

蝸廬小小亦精良日照茅檐未下牀野菜霜培三臘
味鄰花風送一分香老妻憔悴猶春杵嬌女聰明自
理粧何事離家求薄宦枉拋心力付鞍韁

江上

冷吟閒醉遣愁魔
山繞園屏水疊羅
衾枕夜涼霜氣逼
櫻欄葉老雨聲多
敢誇筆力如牛弩
莫望功名到馬珂
尺素欲憑雙鯉寄
故人遙隔洞庭波

出門

頭顱已蕭颯
文史未足用
還家視鄉里
仰屋嗟屢空
出門無一言
但言各珍重
去去復遲徊
不忍別羣仲
河漢星漸稀
松柏露猶凍
雞聲亂愁緒
馬背馱殘夢
隔岸舟子招
趁墟市人閑
米思仲由負途
慮步兵慟

回首望故鄉青山若相送

此夕

相逢此夕共銜杯舊伴新知莫浪猜蠟鳳尙看燒爛
漫釵犀無復辟塵埃卷中人惜崔徽老湖上春遲杜
牧來回首十年如一瞬桃花流水隔天台

竹西亭訪舊圖爲孫楚樓茂才題

十香詞豔寄瑤華柳絮清才未足誇身病經年常謝
客家貧隙地不栽花還鄉季子裘仍敝避席秋娘扇
欲遮珍重隔簾通數語竹西亭外夕陽斜

木蘭院廢址

木蘭廢址長荆榛當日闔黎眼力真清淨佛門功德
米那能養此不才人

野店新晴

風掃一天雨晴曦滿四郊溪溫魚孕子檐破雀移巢
奔瀑穿巖罅垂虹挂樹梢趁墟買新筍吩咐小奚炮

野渡

衆流匯巨湖蕩漾數百頃人車載一船泛入空明鏡
風傳漁唱遠煙濕鬚眉冷偶然一聲篙點破衆山影

山行

片雲欲出山風若挾之入片雲欲入山風若挾之出
雲心無去留風力有徐疾絲絲金縷光斜逗半邊日
奄忽相踰間山在雲中立翻疑雞犬聲神仙有窟宅
松花落如雨壓側山僧笠雲盡山亦無但覺衣裾濕

聞友人子年少爲僧

曾共山翁鬪彩毫堂前嬉戲見垂髦田園蕩析都書
券親舊凋零孰贈袍遊子辭家皈梵教才人無命讀
離騷西華葛帳當風雪我愧天涯首獨搔

茅山柏

李衛公平泉草木記有茅山之柏蓋側柏也葉細短而扁如剪繙綴枝層次櫛比余往來山中曾見五六株大逾數抱四時蒼翠亭亭嫋嫋真神物也衛公博學多識一經品題遂增聲價而遐方殊種亦其勢力有以致之能無慨然

詩題丞相廟記勒衛公莊抱日鳳鸞宿參天風露香柔姿含婀娜遠色送青蒼遠望如柳故俗呼楊柳柏欲向茅盈乞

移栽書舍旁

閨意篇

夏山無定色秋水多離聲君子遠行邁時光若流星
聞君桐廬住四月下吳興昨日寄書來發自淮陰城
架上列圖史隴上收稌秔開徑有三益晨夕相酬賡
緣何久羈旅江湖爲漂萍梁孟企遺範妾願賦鷄鳴

泗亭驛

亭長碑殘字跡磨夕陽瘦馬走盤陀山登廣武英雄
少人比長沙涕淚多野鳥銜花黃石廟小兒拍手大

風歌道旁落盡枮榆葉泗水蕭條不起波

邾城道中

亂山缺處見朝暾洗沐匆匆老瓦盆驢背推敲難得
句桃花籬落自成村黨人不見張元節詩格誰如何
仲言石刻頌秦沿路賣當年太息蔡東門

自東長安街移寓櫻桃斜街

一路棟花風吹上長安道一年長安街緇塵涴我縞
借彼彌勒龕靜坐破煩惱落葉何蕭蕭籬僧懶不掃
前度庭中槐亦如人漸老微霜隕霄漢萬戶暮砧搗

呼童啓行篋得我故人稿爲言淞水濱五畝計須早

出都留別同人

此行三度出長安未卽爲官待補官兒輩瞻依添別

恨

兒子鎮郊仍居外舅
李瀛門比部宅中

友生鄭重勸加餐吳門路近

還家易燕市人離促膝難深感烏衣諸弟子頻年寄

榻累

豬肝李小瀛徐子逢諸君

五雲回首望觚棱雪後沙溝見薄冰腳底紅塵皆是

綱眼前黑漆欲傳燈蓬瀛福地身難到章贛危灘光

已徵

詣前門外關廟求籤有十八灘頭說與君句

試吏原求升斗養皋魚

風木久椎膺

憶昔

憶昔離家汗漫遊芒轍踏遍太行秋雲拖雨腳歸秦
隴風送河聲入晉州匹馬短衣千里健繁弦急管五
更愁而今舊事銷磨盡捧檄南旋雪滿頭

儀徵江口

大雪蔽空下江行始信難鹽鹹門戶險墟落水雲寒
劉濞銅山錫伍胥劍氣殘蓬窻團坐夜小女憶長安

兒子鎮鄉留都
會試未得隨行

天塹東南郡江濤日夜春煙迷瓜步樹風送蒜山鐘
千里皓如許三更愁正濃明朝石城外定有故人逢
重過秦淮不勝今昔之感除夕舟中守歲賦示

內子

此行骨肉自相依守歲天寒酒力微六代江山迎鵠
首十年燈火照牛衣桃花扇影人將老燕子簾鉤事
盡非惆悵坡翁留後約買田陽羨幾時歸

采石磯

亂鴉聲送鯉魚潮風急天寒氣沉寥才子英雄留勝

迹青山黃葉夢前朝孤舟八口煙波寄濁酒三升塊
壠澆白紵歌聲應未歇謝公魂魄我來招

馬當山阻風

連日行程滯今朝又卸篷愧無王勃賦偏打石尤風
翠色雙孤接潮聲九派通一樽酌江月水調弔英雄

望廬山

招隱書傳鶴未回蓮花峰下遠公臺淵明大有匡時
志豈肯低頭入社來

題解小鐵食破硯齋印譜

雪漁蒼勁三橋雅二百餘年少替人今日章門來聽
鼓翫君錐篆一移神

桃花瑩凍澄心紙籬葉靈書勾漏砂識字須探秦漢
上姜黃金石在君家

題鄒虛谷貳尹二雲遺跡冊子

姓名曾記御屏風二百年間兩召公人事銷沈遺愛
在甘棠花映佛燈紅

文山香火留仙露子美園林改大雲一塔鈴聲三尺

雪禪牀相對夜初分

已亥正月三日大雪與君同在繩金塔寺監查粥廠夜分被酒

出此

索題

法律重修宗戒堂新詞題遍白雲莊名臣事業多辛苦換得頭陀一瓣香

題王海樓貳尹倚欄小像

美人嗟遲暮志士感蕭瑟拈鬚覓佳句抱卷耽著述
心事有百端皆由倚欄集瑤瑤昔強仕於越宰劇邑
相如難蜀文太沖賦吳筆誰憎汲黯顛豈憚柳惠黜
改官來豫章研經尚翻帙區區藍田丞亦足傲槐秩
示我分身圖其骨秀而逸梧桐疎雨過涼翠手新裳

我今守慵鈍心印波羅密分箋屢挑戰催我操不律
畫像無妍媸世事齊得失請君對君影是一究竟非一
秋闌分校和馮子良大令原韻

漫說天花一笑拈十年風雨憶蘆簾文求劉勰雕龍
好法比孫陽相馬嚴墮溷漂茵誰爲判清才濃福最
難兼平生未識波斯寶老眼麻沙已自嫌

鍼芥還從暗裏投且將江水洗雙眸敢誇衣鉢傳高
足願放英雄出一頭駿骨金臺原有價珊瑚鐵網未
全收延平重躍干將劍夜靜光芒射滿樓

冰壺玉鑑選樓中似隔銀河路不通丹藥竊來防閉
月蓬萊將到怕迴風評花次第羣芳譜拔幟艱難一
將功試看紙鳶高百丈有人扶送已凌空

隨身竿木慣登場未學操刀割已傷羅漢從來成佛
少書生幾箇破天荒玉蟲吐焰三更雨蒼鶻搏秋一

背霜自分出山爲小草李桃真愧列門牆

余與正考
季仙九宮

詹同出鵠舫

相國門下

望廬山五老峯積雪未消

湖波聲已縮樹色霽未開遙望五老峰白玉堆崔巍

相隔十餘里寒氣森然來其高插雲漢羅列金銀臺
緬懷康王谷瀑布如轟雷中有老仙翁采藥今始回
何時三笑亭登覽傾百杯塵事謝羈束邱壑隨徘徊
山僧有魁芋留待他年煨

于役湖口駐梅家洲

蕭瑟蘆洲上編茅屋兩三欲求上鐘石悵望大湖南
曾曉峰廣文許以石鐘山佳石見贈風雪催軍艤波濤震佛龕章門舊
同事把酒且深談

謁周公瑾祠

都督昔曾官此地我來攝宰已華顛後宮環珮新僚
墻大將旌旗美少年社鼓尙防音節誤廟門飛入浪
花圓天將漢業三分限丹旐巴陵哭杜鵑

過玉笥山麓觀所謂泰石者根蟠十餘畝瑰琦
崛岝擅林木洞壑之勝六石中之一也

上清羣玉府泰石六中一媧皇補天時留贈浮邱伯
拔地毓神秀摩空盤寒碧森森偃蓋松鬱鬱倒生柏
谿舒鐘乳洞滴瀲丹砂液天風鏘然鳴如聞紫霄屐

何紫霄玉
笥山地仙

將去峽江留別士民

上官憐我駑駘質斗大山城可藏拙吏胥笑我詩書
魔不施鞭朴難催科代庖五月幸免罪訟庭雨後生
青莎官民交困亦交怨江河日下無迴波漢唐以來
裕國賦租出穀米庸出布自從官府督現錢以粟易
錢輸縣庫農出現錢官易銀加添火耗額外征十月
新漕趲開兌樣米腳米多其名淋尖踢斛是常例零
星窮戶惟吞聲倉中鼠肥倉蠹飽漏卮奴僕皆沾唇
限期折色色更重州縣那得私囊纔升丁輓運水腳

費陋規歲歲年年增我今作詩代忠告詩似香山嫗
能讀父老莫署官長貪官亦忍淚不敢哭偏災慎勿
求緩征今年緩征明年續新糧補得眼前瘡舊欠剜
卻心頭肉催租日夜吏打門犬吠狺狺鷄喔喔卽今
逋賦五萬緡妄想他年悉蠲復父老聞言酌我杯道
旁立馬還徘徊捫心一事愧未了江干白骨方銜哀
北門外江水濱岸有義塚數百
適當其衝議創捐築堤未果

鐵佛寺題壁

凌雲峰下道場開不爲微名不肯來一院月明花解

語九皋霜冷鶴懷胎探幽欲策夜光杖破悶思斟自
煖杯前度劉郎似相識老僧迎我立蒼苔

讀史記偶題

編年變紀傳萬世爲鼻祖惜哉良史才遭遇漢孝武
六經植根柢百氏供纂組古今合鑪鑄造化恣吞吐
凡百三十篇麟經纘微緒班荀汗欲流肩左首應俯
遂膺鬼神忌蠶室致薰腐貨殖及游俠乃以悲憤敍
日之爲謗書王允實齟齶何物褚少孫貂缺狗尾補

登滕王閣口號

秋水長天畫不成風前蝶尙多情江山久被元嬰辱誰說庸夫浪得名

野步

平林漠漠鎖蒼烟複袷裝綿雨後天春色不知將過半菜花黃到寺門前

東皋農事不須催早稻青青已遍栽纔喜新晴聞鵠噪斷雲銜雨過江來

寓齋木香棚下月夜招集顧秋圃司馬蔣矩亭

汪春生兩明府小飲

木香棚底惠風和明月來窮金叵羅骨相未離窮措

大情禪猶縛病維摩

承詢小兒近日疾狀

半生技笑屠龍拙幾

輩人嘲畫虎多郤羨諸公豪俠甚金剛舞與夜义歌

司馬兩明府寓中招客肴饌精美故戲及之

闡中和弓篴鄉明府韻呈趙蓉舫大廷尉鈕松

泉殿撰兩典試

又見星輶客使過扶輪鉅手重陰何文章鳳閣添新

製法曲霓裳聽大羅湖水光中懸藻鑑

貢院在東湖上

桂花

香裏話鑾坡

奎宿堂前丹桂五株嘉興錢文端公典試時手植後僅石少宗伯復來典試作

詩以誌佳話
今大可合抱
江南曾泛仙槎去
網得珊瑚問孰多

廷尉

典甲午江南試
殿撰在己亥

試院煎茶露氣深
歐梅唱和共聯吟
須知燭影三條短
尙有文思一縷沈
披卷真如風雨過
聞香重把蕙蘭尋
粗疎敢說傳衣鉢
矮屋當年證此心

詠史

風聲鶴唳遍炎方
消息庚郵斷五羊
曲突徙薪應早計
開門揖盜已疏防
令公有意招回紇徵側無能是
女郎嘆息南塘人不見
一軍樓櫓水師荒

蠻花狡鳥近如何
日繁華付逝波
常說漢文思李牧
誰教趙括代廉頗
金繪南渡和戎議
烽燧西涼出塞歌
攜得吳鈎含笑看
十年壯志久蹉跎

玉簫金管一時收
海色冥冥入暮愁
兵火已開無量劫
神仙難覓最高樓
棘門將帥如兒戲
葛嶺平章挾妓遊
祇有壺關舊三老
上書卻爲至尊憂

健兒團練陣雲屯
牡蠣灘前落照昏
巾櫛徒聞羞仲達
艤艤已惜走孫恩
妖星尚閃旄頭焰
小醜終驕釜底魂
倉猝逃亡萬家屋
新婚垂老石壕村

寶劍篇

千金買寶劍置諸鹿革囊偶然一把玩十指繞電光
太平幸無事遂若鉛刀藏及茲待磨礪頽然鬚已蒼
夜中不能寐起立望天闇蚩尤掃河漢北斗寒無芒
長嘯出門去走馬燕趙疆物色遊俠士贈之以干將
豈無虬髯叟或逢聶隱娘猶恐化龍逝風雨歸渺茫

自沙井夜歸

兩楚勞征調軍行過豫章羽書飛驛騎燈火亂帆檣
邊事誰開衄征人欲望鄉穗城圍未解亟爲掃欃槍

題汪春生大令松露洗心圖

春明十載神已交偶然宦轍同繫匏邇來司馬權冷
曹風格磊吸蒼松高君本西清香案吏改官墮落紅
塵地栽遍安仁一縣花分陰到處甘棠樹虎頭寫影
神亭亭脫帽露頂蕉衫青東坡自製種松譜支遁新
箋相鶴經金莖露向金盤吸滿袖雲霞氣新裏但教
方寸洗靈臺慧業仙根沆瀣合舉杯明月今當頭邀
成三影相綢繆雪泥鴻爪尋陳迹戈壁龍堆憶舊游
君有西域從戎圖曾爲題詞冰心朗澈玉壺內何處太清著滓穢

乞君一盃藍橋漿潤我相如渴詩肺

手版

手版生毛字半行濫竽日日一登場典衣裘葛因時
易披卷丹鉛隔夜忘詎有酒家疑阮籍早知翁子薄
張湯南華悔讀仍無益贏得人呼白首郎

感事

紫微樓閣近蓬萊日午銅鑕叩不開曾見櫻桃攀玉
腕休言芍藥損珠胎游仙夢醒占風鐸禮斗香銷望
月臺安得許多妙音壘一時青犬盡迎來

鳳世靈根記浣紗琉璃窗下嚼紅霞詩篇未詠崔羅
什條脫猶貽萼綠華自有珊瑚常倚玉那堪彩鳳便
隨鴉臂酥嬌護綢繆印留得麻姑一撮砂

鞋未成弓髮未齊桃鬟新插九離笄強搜絳樹移根
去遠嫁烏孫掩面啼搏雪頓消空裡影落花多委路
旁泥如何宛若通神後方朔攜歸作小妻

手把芙蓉駕羽輶碧城歸去路冥冥妙蓮不汚天魔
刲錦瑟猶彈帝子靈煮鵝焚琴原慘酷孀鸞寡鵠盡
漂零笑他作俑蕭方智不許人間讀道經

湖口

一葉風帆似箭飛打檣船恰繫苔磯長江合浪兼天
湧湖口東十里卽大江合流處遠岫腥雲帶雨歸竹屋飯香紅稻熟蓼灘沙淨白魚肥吳頭楚尾頻來往司馬蕭蕭鬚漸稀

墨製釋迦牟尼佛像歌

庭珪寶墨世已稀蘇家贗製猶稱奇金缸烟炬代松炬萬初法從真定遺範模山水雜花鳥雕銳龍鳳兼虬螭黃金一斤墨一片嗜痂往往成獸癡化身忽現

迦葉相華鬢瓔珞陀羅尼麝泥搏埴香在骨中有功德旃檀鬱亭亭蓮座供棐几墨崑崙見慙鬆姿我聞古書用漆寫八體心得腕中規厚重油烟妍潤喻麋未必權能司墨耶佛耶二而一當年面壁顏微黧何須更鑄賈島像膜拜卽是詩禪師磨人磨墨有時盡不生不滅無窮期

題畫三絕

梅花

疏影幽香戶不局一丸涼月照孤汀逋仙心事無人

解訴與梅妻仔細聽

鷓鴣

鷄鴣江上掠烟波素翮翩翩躚雪影過同是胎禽身價
賤不如鶴處只緣多

松上鷹

神俊真堪入畫圖金眸轉側睇平蕪年來飽食松巔
睡不啄鵠梟啄燕鶲

冬日鉛山道中小憇田家

獨木三折橋行行須緩步一徑繚而曲奔流復穿注

寒色赴林莽南畝畢農務築場淨如鏡碌碡猶在圃
婦孺有餘力相與收蔗芋今年秔稻足謀欲製襦綺
昨日縣帖下比戶又催賦但願忍飢寒勿遭胥吏怒
激輪聲潺潺野碓自環轉山田分活水高下多接甃
豎子解飯牛生客引吠犬早梅已聞香倏忽歲將餞
所嗟禦寒衣夏前三月典地偏無外誘心紺有餘儉
芳蔬擔入城濁酒蓄盈甕國課幸輸完生計且貼勉
遙望布同雲雪意在高巘

觀音亭小集聽王蓮屏明府琴用東坡聽賢師

琴韻

我多慷慨意不平
賴君一曲神爲清
天籟宮商徵羽角
非指非絃亦非木
梧桐落子夜打門
悄然秋悲佛不瞋
人間處處有山水
人間卻少鍾期耳

自樂化夜歸向僧舍乞火

龜燈無焰影淒涼
殘月微留石砌光
夜半禪扉猶未掩
水田衣挂竹方牀

謝鄭芝生明府惠弋陽蜜酒時病痔戒飲兼以
戲之

佳釀分來老瓦瓶小奴日暮叩柴局醉從徐邈稱中
聖病學靈均暫獨醒花月因緣鬚早白功名泡幻眼
誰青君言語觸忤當事以細故罷官康成一石腸如海貽厥還須念
典型

萬安女

十五小女髮緒沙赤腳翻踏轆轤車門前一樹天桃
花此中疑是避秦家雙鷄斗酒及時嫁青廬只在東
西舍呢喃燕雛離母飛不識人間有王謝

過嶺卽景

村女牽祛自結羣村農擊鼓賽元君那知雲氣霑衣
濕身入山中不見雲

山行大雨避康王廟

腳底鳴春雷一聲震山嶽銀河決口倒千丈萬斛真珠灑天幙狂風撼大樹樹老根不搖榦摩葉裏與酣戰聲如八月錢塘潮羊腸曲徑水沒骭偶一失足顛深坳高檐認鶯吻爭赴康王祠康王何神本無稽屋漏見天僧獨棲始知數椽蔽風雨猶勝灌頂身淋漓羲和踏輪出杲杲晚晴日山中兀巍霎時安平地漂

流萬家室

閩建昌縣山中雷雨蛟起漂蕩民廬

上清

上清寂寞散花身采得華芝海又塵王母年來更昏
耄盡將仙女嫁凡人

吳城山小龍神廟月上

暮色一千里蕭然孤客情山連星子近秋共月娥清
宿鷺聯拳影跳魚撥刺聲農疇待霖雨鞭起小龍驚

贈人

玉蘭花映水晶屏岸幘吹簫月滿庭十二年前春夢

過白頭慙對阮公青

江州卽景

半嶺綠楊鶯堠一江紅浪鳥亭未煮桃花香飯先斟
柏葉仙醡

緝索穿來榜艤麻晉網得鱗鯉三日停橈不渡孟婆
風阻潯陽

柴桑

五柳先生宅高風嫋首陽詩中留甲子窗北有羲皇
蓮社終難屈桃源未肯忘六朝如夢過互古此柴桑

達摩院

解脫東遊一笠輕何年香岸築金城帆從白水灣邊
卸人在青山缺處行薜荔藤堅支壞壁桄榔葉大動
秋聲藥罐茗籠無安置十笏僧寮借養生

詠懷

輾轉夜不寐啓戶立庭除寒風悚我骨繁霜霑我裾
衆緣無所感萬象還太虛如何雞旣鳴皇然失其初
哀哉情慾焰燒此瞬息軀生存同草木零落墳溝渠
楚楚蜉蝣羽不知鳳九苞離離蓬蒿枝不羨松柏高

斥鶴附鵬背萬里干雲霄巨鯤失大壑轍鮒同枯鱠
物性各自得時命任所遭搔首仰問天天視一秋毫
蟪蛄昧春秋蟻螻逝朝暮人生老病死大限莫能度
三萬六千日宇宙偶僑寓今日事方殷明日跡成故
經營沒世名迺爲讀書誤所以古高士返眞守靈府
兀坐獨木牀終身不言語

田家冬釀熟燔黍復捭豚農事得少休招邀具盤飧
老翁速諸父老嫗抱雛孫婚姻及兄弟道近無遠村
揖讓已脫略語言彌率眞誰云黃農沒此卽懷葛民

果哉避世士欲問桃源津

侯生隱夷門荆卿臥燕市相逢一握手肝膽許之死
精神貫金石談笑訣妻子豈求身後名惟欲報知已
南山風雪中射虎有壯士腰佩轄轔劍寒芒照秋水
不肯道姓名但言肉生髀寂寞無人知埋骨岩阿裏
峩峩嵩高山洞天繚而曲仙官日來往穿雲跨飛鹿
中有紫衣人靈香皇子族云自瑤池歸攜芝手如玉
咨嗟摩我頂授以長生錄丹經霹靂文一字不能讀
彭聃固非壽汪踦亦非天太素細縕氣偶然著形兆

深山一道士高尙慕商皓默誦參同契遐思駐蓬島
金童與玉女交梨及火棗丹竈九轉成填精且補腦
飛昇未有期容顏日以老時聞蟬蛻人白骨蔽秋草
少年氣豪邁韜略讀孫吳千金買鞍劍志在屠貔貅
定遠早投筆傳生終乘輜先通西域國後封狼居胥
策馬燕然山手鐫壁策書銘功告天子頌揚清廟謨
鬚眉自顧盼合上麒麟圖長揖歸故鄉一舸浮五湖
步出北郭門春鳥向晴哢古塚何崔巍殘碑字裂縫
神道犁爲田宰木鋤爲棟牧童跨石馬荆蔓抱翁仲

緬彼泉下人千秋如長夢昔年溢朝露當亡有餘慟
邊功誇衛霍政績薄姚宋秘器東園贈靈輶虎賁送
太常議美謚中使薦時供朝市倏變遷姓名少傳誦
生爲鸞鳳翔死與蛟蟻共

東南繁華地通衢界吳越第宅如星羅岩峩跨城闕
楩材豫章購峰石太湖伐樓高阻飛鳥亭敝貯明月
梓澤久邱墟平泉亦銷歇詎知土木興若爲招提設
今時法雨壇昔日銷金窟不見寺門前溪聲尚嗚咽
我登首陽山春風長薇蕨我謁左徒廟山鬼聞歌哭

乾坤際板蕩高岸易深谷忠義出天性豈慕古賢躅
攀髯旣已墮化鶴還相逐倉皇建義旗事敗湛七族
父老傳姓名青史未編錄

妾年十五時畏人身背轉采桑東陌頭與君偶識面
謂妾貌如花蹇修致纊縫聘以明月璫贈以雕金鉶
葛蘿施喬松枝葉互蔥蒨鸕鷀比翼飛形影不離遠
永懷百年老詎被一朝譴新人顏愈嬌故人顏愈變
着我嫁時衣行行舊針綫回頭語新人勉視尊嫜膳
覆水倘能收黃泉尙相見

翩翩誰家子金屋貯佳人芙蓉映蝶帳蘭麝生鴛茵
舞垂春笋手歌嘲櫻桃唇嬌多未回臉寵極猶含顰
相期共安樂亦願同苦辛世事有反覆焉知撤瑟辰
黃土已埋骨紅粉不成塵千古報恩妾惟聞石季倫
嬌嬈李延年婉變周小史韶年十五六容華若桃李
粲然顧我笑雙瞳剪秋水吳姬既含媚趙女且羞比
此心託明月清光奉君子幸無前魚泣恐貽艾獫恥
不見荷家鳳飛入阿房裏亦有梁家奴花間窺齶齒
曜靈出扶桑光暉滿九域直使覆盆照豈惟燭火熄

如何麒麟鬪金烏掩其翼一日一周天亦有不到國
神聖運大智重離赫如日賢佞尙同升猶煩指屈軼
萌反文叔嘆謾敗武侯泣察察以爲明得一失之十
父爲九州伯子作五湖長腰下青珊瑚王孫哀獨往
運會遘陽九富貴詎常享登車望四野大地多塵埃
鬱鬱青霞氣何時一騰上功業未及建白髮已垂顙
青門種瓜人無復封侯想

束髮弄柔翰遭遇多坎坷便欲棄天親空門事般若
塵根未解脫藩溷轉傾墮西方有聖人面壁九年坐

一葦渡東海赤手不持舵旣無文字禪亦無智慧果
衆生太饑舌乃以蠶絲裹入萬金藏經可付祖龍火
陟彼孟門道立馬望黃河楚漢已澌滅英雄白骨多
三峰削神禹水石相薙磨匹練九天落濤頭如飛梭
滔滔東南去萬頃揚洪波堰瀦濟漕運大艤浮嵯峨
濁流漸淤壅淮徐方薦瘥當年民力竭民力今如何
朔風起天末木葉庭中飛流沙二萬里壯士寒無衣
不悲壯士寒所悲父母饑生兒遠行戍不如老無兒
無兒心斷絕有兒常苦思邊城隔消息寢寐夢見之

丈夫生不辰忠孝事兩虧征調有瓜代一誦尸饔詩
劉公廣絕交元伯感死友交道薄如紙誰與訂杵臼
念我同心人總角周旋久相逢警車笠永好報瓊玖
送君上河梁涕泣還攜手一朝雲泥隔棄我若敝帚
別來三致書回書未曾有膠漆中道離何況期白首
出門將何之四顧立彷徨層巒互虧蔽浮雲如韻頡
擊楫渡汾陰翩然遊大梁是時流火西中夜竇微霜
千里少疇匹歧路入太行熊羆號我前鶴鵠嘯我旁
我僕羸且病我馬元以黃感謝賢主人逆旅相扶將

古賢懷一飯今尙愧翳桑

膏火明自煎山木美自寇史慚班馬良文遜淵雲富
欲以蜩螗鳴妄擬鈞天奏搖筆不肯休腑肺逞雕鏤
聖人有大道白日懸清晝詹詹小言家焉足補遺漏
禿眉復僵腕著作稿難就縱貽棗梨禍徒供醬瓿覆
偉哉老伏生獨抱一經守

帝皇治蠻貊絕海與限山中夏境夷險不使來窺覘
遼西置鮮卑驍騎借三韓資彼一時利貽我百世患
貪牴本無饜撫馭良獨難所以古賢哲先幾策治安

請禁海舶市請閉玉門關

清談妙正始咳唾霏珠璣語錄盛宋儒高義孔顏齊
九流渾濁日神州陸沈時才多識偏寡志大用非宜
空言少實效徒令後世訾乾坤久否塞必資雷電威
膏肓久癥痼必求剖腹醫所以忠武侯手自寫韓非
潛身作鰻屈出世爲龍飛

洛陽居奇賈聲利擅三川遊俠駕翁伯策鹽傾計然
金張賓從集許史婚姻聯珠服耀深闢玉臺羅芳筵
枯槁一嘘植捷若春風旋宏羊踐九列卜式膺三遷

以彼貨殖魁可奪君相權惟有嚴高士寂寞蘆簾前
鷓鴣棲一枝偃鼠飲滿腹凍雀寄茅檐場圃飽餘粟
太空何寥廓萬里翔鴻鵠中道無所歸饑鳶啄其肉
富貴草頭露年命風中燭守株方待免得隴猶望蜀
吁嗟馬文淵薏苡生謗讟寄語世間人碌碌多厚福
今日何戚戚召客開樽罍歌舞皆妙選十二金釵姬
步兵爲我友伯倫爲我師一醉三百日蠟淚如山堆
未知窮達境那識理亂時生封安樂公死葬糟邱臺

病起遣興

春光已到海棠枝且向花前醉一卮天水王孫鷗鳥
畫杜陵野叟草堂詩忘機漸用無心稱廢學真慙沒
字碑那得形骸便衰老夢中嬉戲尙童兒

春暖

暖風初卸穀衣單蜂蝶紛紛繞畫欄惟恐名花開太
驟天公乞賜一分寒

書懷

蕭蕭白髮吳興令才退生花筆一枝藥草遍栽因療
病俸錢微積待鐫詩古人有恨傳心史清議無私問

口碑三凡猶參歸未晏遺編堆案尙勤披

山行

亂山無近路羈客獨長征殘雪馬頭凍夕陽牛背明
所思之子杳前有天河橫試問勞勞意蹉跎負此生
喜章西巖表弟至

我姑已衰邁蒜髮汝初生骨肉傷心淚

時子婦李氏以婉難亡

家鄉瑣尾情烽傳徐福島饊轉闔廬城

南中近事夜坐厭

厭久燈光照雨聲

得三弟野漁四弟淞逸書

生計雖窮薄家門要護持一封書到日雙淚手揮時
書中已得兒亡凶耗累重宵難棄身衰事更危鵠鵠聲咽嘶飛
遠紫荆枝

八月二十八日生朝距兒亡七十六日矣時在
巖溪行館淒然賦此

略似僧虔憐仲寶祇留徐淑伴秦嘉朝衫束縛腰須
折詩句推敲手尙叉消息難通泉下路聰明空夢筆
頭花半生嘗遍酸辛境那有回甜到齒牙

半百年華近夕曛名場蠻觸事紛紜死灰未信韓安

諸窮鳥猶披趙壹文屢典琴書償夙債待裁松檜護
新墳何時一舸東歸去穩臥淞皋十畝雲

宿靈芝山胥雲庵

浮屠桑下不三宿我叩禪扉別有情山好何妨權小
住僧閒聊與說無生颶颶殘葉風前埽指點斜陽雪
外明真覺上方諸品靜隔簾坐聽煮茶聲